



FELCO
Federation dels Ensenhaires
de Lengas e Cultura d'òc

Aquitània, Auvergne, Ile de France, Languedoc, Limousin, Midi-Pyrénées, Provence-Alpes-Côte d'Azur, Rhône-Alpes

Butletín n°216
14/11/2006

RAPORT MORAU 2006.

1) La situacion generala

Lo temps vai e ven e vira, coma disia l'autre. Lo rapòrt de l'an passat s'acabava sus una nòta galòia, ont caupia tot l'optimisme que nos poia inspirar lo succès de la manifestacion de Carcassona.

Un an puèi, nos chau ben constatar qu'aquest optimisme èra benlèu pas tant justificat. Lo succès de la manifestacion nos avia impressionats, mas lo ministèri e lo govèrn aquò los a pas tant trebolats. Vertat que lor sensibilitat als moviments de massa es pas famosa : en gròs, bolegan pas qu'au dessobre de quauques centenas de miliers de manifestaires per carriera amai, pas sùbit.

Aviam demandat au Ministèri un rendetz-vos non pas amb lo charjat de mission ordinari (qu'es d'alhors s'o es encara, una charjaa, una dòna Vicentelli) mas amb lo Director dels Ensenhaments escolars (vulgarament DESCO). Après d'estre estats lanternats un brave moment, n'avèm tirat la conclusion qu'aquel òme se sentia pas ges compelit de nos reçaupre.

Desempuèi, las respòstas qu'avèm las avèm coma sempre via lo canau acostumat, lo de las respòstas a de questions escrichas dels elejuts de tota color que trasmeton nòstras demandas. Disiáu l'an passat que las respòstas dau gabinet de Robien èran mens estereotipicas que las de Fillon, mas pas gaire mai favorablas. Aquò s'es confirmat, tament que nos a chalgut amagestrar per los elejuts un argumentari que desmontava totas las - digam - aproximacions que caupian dins aquelas respòstas, suu nombre d'ensenhaires e sa progression entre autres.

Los diverses CREOs an agut còpia d'aquel argumentari, que pòdon doncas utilizar dins lors rapòrts amb los elejuts de lor canton, o a la CALR de lor academia. Poèm pas laisser passar lo discors endormisseire dau Ministèri, qu'amaga pas tròp ben una indiferéncia totala au problèma -mens grèu, es clar, que la proliferacion sornarua de partidaris dau metòde globau, de satanica memòria.

De questions, n'i a donc agut,

- suu **CAPES** tornarmai,
- sus la **plaça facha à las lengas regionalas dins lo primari** aqui ont lo text Fillon prevei ren que de lengas vivas estrangieras,
- o **suus coeficients de las lengas regionalas au Bac**, qu'istan estadisses au moment que se revalorizan los de las lengas mòrtas o d'autres matèrias.

Localament tanben, los problèmas mancan pas :

- dins lo segondari per exemple, en Aquitània o en Droma-Ardescha entre autres.
- e se sap que dins lo Superior, l'ensenhament de l'occitan a Pau es amenaçat.
- mai recentament, avèm agut una alèrta que nos i esperaviam pas : la decision de l'Ostau dels Examens d'Arcueil d'organizar pas mai l'espròva d'occitan (e sembla, d'autres lengas regionalas) en region parisena. Las justificacions d'aqueu refus èran embolhosas : quora s'aprenia, disian, au fach que sabian pas que l'i avia un cors d'occitan en region parisence-es vrai que, creat en 1976, constituís una inovacion recentissima qu'es perdonable de n'estre

pas assabentat dins los meitans autorizats. Quora èra per dequé avian pas de tiera d'examinaires competents -n'i a sempre agut, despuèi lo temps de la lei Deixonne, e la tiera, l'avian, mas basta. Puèi an descubèrt que la lei Deixonne, justament, enebissia que se passesse l'espròva facultativa alhors que dins las regions concernaas -la Lei Deixonne enebis ren (e autoriza pas grand causa, es vrai) ; amb aquò, es aüra integraa au Còdi generau de l'educacion nacionala. L'explicacion vertadiera sembla totun estre que, per aqueu mond, la Lei Fillon remanda aquel ensenhament a las regions, justament, e a elas solas. Après d'aguer un pauc bramats, e d'aguer fach bramar nòstres amics Còrses, qu'es de mond que sabon atraire l'atencion, los servicis competents, coma dison, an acceptat de tornar durbir l'examen, per unan au mens.

L'episòdi nos porgís mai d'una leiçon.

- la necessitat de la vigilància : es lo CREO Talvera que nos a alertats e qu'a menat la batèsta, amb nòstre sostenh. Nos a alertats perqué es estat assabentat, e qu'a reagit. Mas de pertot l'i pòt aguer ansin de pichons chaps que decidan de marcar o de marcar pas los escolans en occitan segonda o tresena lenga, amb los motius los mai diverses. Ne chau tenir un compte rigorós e menimós.

- Los sostenhs qu'avèm aguts. Es pas sens interés de notar que los primiers a se bolegar son estats los colègas berbèrs e creòls. Costat lengas regionalas istoricas, en fòra dels Còrsos, la reaccion es estaa mens viva, o mai tardiera. L'urgéncia estrategica es de mantenir au mai possible una coordinacion amb las autras lengas : es pas ganhat, d'evidéncia. E va sens dire que nos chau pas considerar que dau moment qu'aquò s'es passat a Paris, en terra enemiga e luenh dau sòl sagrat de la patria, es puèi pas tant grèu. Es grèu.

- Lo fons de l'afar : se l'argument màger es efectivament l'aplicacion estrecha e tucla de las dispausicions de la Lèi Fillon, avèm totas las rasons de nos inquietar : l'alèrta tornarè restontir l'an que ven. E vòl dire que per lo Ministèri, l'occitan es pas una lenga "de França" mas la lenga d'una resèrva d'Indians, dins aquel sud luenchenc entre Hossegor e Luberon. Rason de mai per quichar, n'autres, suu concepte de lenga de França, e d'afortir qu'a Paris coma a Marselha, l'occitan a lo drech d'estre reconegut per l'institucion escolara, quand la demanda exista, foguesse qu'au nom de l'egalitat republicana davans l'examen.

Piejo : lo text Fillon precisa ben dins son imprecision globala qu'aquel ensenhament de lengas regionalas se mena en convencionament amb las regions. Sabèm pron que las sirènas dau tot-region qu'an ja pivelat d'unes amics bretons per exemple, laissan pas indiferents d'occitanistas fiers de lor antijacobinisme militant. Repetem un còp de mai çò que la FELCO avèm jà dich, collectivament après de n'aguer discutat entre n'autres : lo ròtle indispensable de las regions deu pas far eissubliar que la responsabilitat primiera de l'ensenhament de nòstra lenga es de l'Estat, per de rasons practicas e financieras qu'avem jà dich.

Piejo mai : se s'aplica d'un biais estrech e tucla lo tròç de text Fillon, dins las regions ont l'i a pas de convencion Estat-Region sus la lenga, serè lèu pas mai possible ni de far passar lo bac, ni d'ensensar la lenga. Quicho, n'i a que van dire benlèu - desiro prigondament de me far de làgui per pas ren. Mas que me pròven qu'es pas ansinda que las causas riscan de se passar.

Parlaviam l'an passat d'aquela pre-prepausicion de lei qu'aviam redigia a l'estigança dau malhum Lengas e Culturas de França. O deviam far amb l'IEO e Calandreta. A la fin finala, solet l'IEO nos a acompanhat un moment, einant de s'adriar dins d'autres direccions. Dau còp, lo text es estat fach, es estat prepausat a l'intergrop lengas regionalas de l'Assemblada Nacionala, qu'ai rescontrat en junh amb una delegacion de la FLAREP. Nos èra estat dich alora que chalia pas ren esperar avans la legislatura venenta. E a las darrieras nòvas, solet lo PCF sembla dispausat a portar, benlèu, lo projecte. Es pas coma aquò que veiam las causas, e nos semblava qu'un texte ansin poia capitar ren qu'amb un

sostenh transversau de mai d'un partit, de drecha o de gaucha. Nos chau veire coma las causas son per virar. Mas aquí tanben, chau ben dire que las causas marchan mens ben que cò qu'esperaviam.

Segur, avèm de còps que l'i a de consolacions

- aprenem aüra que los programas de colègi, qu'èran jalats dempuèi pron temps son a surtir a la fin finala. Chal aguer la paciència...

- E de còps que l'i a, l'administracion nos es favorabla. Dins l'Academia de Montpelhier, lo rector a fach de declaracions e emprinciapiat d'accions -de libres sus la cultura e la lenga de difusar dins totas las escòlas, per pareisser lèu- Un exemple que chau pas aguer paur de presentar dins las autras academias.

2) Las amiras per l'an que ven :

- **Mantenir la pression**, amb los aligats qu'avèm : los elejuts marcats sus nòstre quasernet d'adreças, e que contunhan de pausar au Ministèri de questions que li chau ben respondre. Los sindicats, ont nòstra problematica fai son chamin, e ont, sembla, de progresses son possibles. L'APLV, los professors de lengas vivas, que nòstres contactes son totjorn positius. La FLAREP, qu'a lo meriti d'existar. Una manca, encara : los parents d'escolans. Avèm besonh d'elos, e notadament de los que son dins Oc-Bi ; mas avèm tanben besonh de las grandas federacions, e aqui l'i a de trabalh de far – que comença de se far, justament.

- **Desenvolopar lo contacte amb las regions**, partenaris de mai en mai indefugibles. L'urgéncia absolua es aüra de far avans sus la question de las convencions Estat-Region, a travès dau rectorat. Dinqu'aüra, pas ren es vertadierament avançat : de causas s'apreparan a Tolosa e a Montpelhier, mas non sens entramble, trastejaments, e retards. Per las rasons qu'ai dich mai naut, ven urgent d'abrivar lo processus aqui e pertot. Las riscas senon son mai que grandas.

- **La manifestacion 2007**. Se farè, coma chascun sap, a Besiers lo 17de març. E la FELCO participam a la preparacion. Aquest an lo Felibritge es dins lo còp, e es una bona causa, que compensa lo fach que de provençalistas acharnassits apreparan eles tanben una manifestacion provençalo-provençala per lo 17 de març. Lo rendètz-vos dau 17 es de pas mancar, e chalrè que la FELCO l'i seguem nombroses e vesedors. Aquò implica, dins cada academia un trabalh de sensibilizacion, per de dire d'estre mai nombroses a Besiers qu'a Carcassona. Es possible. Es tanben indispensable. L'avenir es pas clar. L'i a l'inconeissua de las eleccions venentas. La FELCO avèm pas de pausicion a aguer sus la chausia dau candidat, mas avèm lo drech de pausar la question als diversès personatges que se van presentar. Se demandam ren, avèm de chanças de pas ren aguer. S'aquò se faguesse d'un biais colectiu entre las associacions occitanistas, emai de las autras lengas, seria pas mau. L'i trabalharem. Aviam esperat a un moment que las autras lengas deciden de far elas tanben una manifestacion lo meteis jorn. Sembla ben que preferan de far chascuna la sieuna mai o mens segua. Mas ren es encara segur.

Tot aquò per dire qu'avèm d'òbra. Amb de rasons de nos inquietar, que devon pas estre de rasons e se descorar e de pas bolegar mai. Ben au contrari.

1- Rampèl AG de la FELCO :

dissabte 25 / 11 / 2006 Universitat P.Valéry Montpellier sala A 105

10 oras – acamp de burèu + delegats de cada acadèmia

12 oras : repais en comun dubèrt a totes. SVP, fasètz-vos marcar que lo restaurant dubrís sonque per nosautres

14 oras -

Es important que totas las acadèmias sián representadas per lo mai grand nombre de collègas.

OCBI, MedOc, Conselh de la Joventut i son convidats.

Per los que son jamai venguts, l'Universitat se tròba al nòrd de la vila, sus la rota de Mende. Parcatge aisit lo dissabte. Per los que venon en trin, a la gara, prene lo tram direccion « Mosson », davalan a « St Eloi » (subretot pas a l'arrest seguent Université des sciences et des lettres). La fac es a 5 minutas a pè. Seguir los estudiants que davalan.

Se sètz perduts, telefonatz al 04 67 14 21 47.

O.J. :

- rapòrt moral : las accions de l'annada 2005-2006
- rapòrt financièr
- budgècte previsionnal
- bilanç de la situacion de nòstre ensenhament
- lo foncionament associatiu – flaquesas e avançadas
- las accions de menar
 - +) intervencions pròche dels candidats a las eleccions
 - +) intervencions pròches dels elegits regionals : quinas politics linguistics ? Cossí endralhar una accion interregionala ?
 - +) preparar la manifestacion de Besièrs, dins l'unitat)FELCO-IEO-OCBI-Calandreta-Joventut, renfortida aquest an per la preséncia del Felibrige), sens laisser de caire las demandas especificas per l'ensenhament public
 - +) 2006 : annada de mantun congrés sindical e associatiu (SE/UNSA ; FSU ; SNES ; FCPE...) : cossí i faire marcar nòstras preocupacions ?
 - questions diversas (sètz pregats de demandar lor inscripcion a l'OJ lo mai lèu possible)

Demanda urgenta a totes : nos mandar un estat breu de la situacion dins vòstra acadèmia, que lo botarem dins lo dorsièr donat a cada participant.

**2- après Carcassona 2005, Besièrs 2007
capitar totes ensemble !**

Anem ! Per la Lengua Occitana Òc !

14, Avenguda Estève d'Orves — BP 60011— 34501 BESIÈRS Cedex —
Tel/fax 04 67 31 18 91 — 06 86 00 66 39 - www.manifestarperloccitan.com

Anem ! Òc! Per la lenga occitana !

MANIFESTACION A BESIÈRS 2007 , lo dissabte 17 de març de 2007